

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA MATI 2021

email: sulusamoa@cccs.org.ws -Main Office: Ph. 24414, Ext 30 - website: www.ccs.org.ws



ASOTASI PETELI & MANŪ TO MAI LAGI

Luga: Malumalu EFKS Sasina, "PETELI O LE FALE O LE ATUA". Lalo: Maota Galuega EFKS Papa Sataua, "MANŪ TO MAI LAGI". O le afiafi ma le taeao, o le Aso Faraile 26 Mati 2021 lea.



FAASINO UPU

1.	O LE LAUGA	2
2.	FAAMAVAEGATEUTUPE	3
3.	FAAU'UGAAOGA TUSI PAIA	4
4.	LISIAU FAAU'U 2021	5
5.	MALUMALU EFKS SASINA	6
6.	OSIGA FEAGAIGA SALEILUA	7
7.	TATALANISI FEAGAIGA	7
8.	UMUSAGA EFKS SATALO	8
9.	GALUEGA EFKS AFEGA	8
10.	MEA'AI TATAU MA LE ASO	9
11.	O LE MANŪ TO MAI LAGI	12
12.	O LE FAAMATI	12
13.	O E UA FAI I LAGI FOLAUGA	14

O LE LAUGA

Tusi Faitau: Luka 8:19-25. Matua: Luka 8: 25, *“Ua fetalai atu o Ia ia te i latou, “O i fea ea lo outou faatuatua?” Ua matata’u lava i latou ma ofo; ua fetautalatala’i i latou, “O ai ea lenei? Auā ua fetalai o Ia i le matagi ma le vai, ona usiusitai ai lea ia te Ia.”*

Manatu Autū: **O LE SILISILI ESE O IESU.**

Ua lē o toe po se lilo i le mata’utia ma le ofoofogia o foliga ua aga’i i ai le Tala Lelei, ma le ituaiga fetosoa’iina ua aga’i i ai le faatinoina o tapuaiga e uiga ia Iesu ma le malo o le Atua i nei ona aso. I le vaavaai ma le maitau i le faatinoga o tapuaiga e fia o le lalolagi i nei aso, ua foliga mai ai ua faaititia le mamalu o le Atua, e le gata ia i latou o le au failotu, ae ua faapena foi i foliga ma amio a tagata lotu. Sa ou matamata i se sauniga lotu sa faatino ai ni faamalologa i se tasi sauniga i luga o le televise. Na mae’a le faamalologa sa faia e le faifeau ma le aualii e to’afā, ona faata’ape lea o tagata sa auai i le sauniga lotu. Ona aga’i ane lea o le faifeau ma sui e to’afā, ua nonofo faataamilomilo i le laulau, ma latou talatalanoa e uiga i le latou galuega sa faatino. O le mea sa ou molimauina, ua na o le faamatala lava e le faifeau ma ana tama le tulaga sa fa’aalia ai lo latou mana ma faia nei faamalologa. A o se isi itu sa maitauina, o le faamatala lava o lea ma’i sa faamalolo ma taliē pe fe’atai, ma faapea a latou upu, Na pau le mea tatou te faafetai ai, auā ua le gata ina viia ai i tatou e tagata, a o lea ua tele ai foi lo tatou tamaoiga ua maua mai ai.

O uiga ma ituaiga amioga ia lea na matuā vaoia e Iesu, e tusa ai ma le tala lea sa faitauina, auā o le vavega sa faatino e Iesu e ala i lona taofia o le matagi ma le vai, o se galuega e le gata sa lavea’iina ai le ola o lona au so’o, ae o se vavega foi e avatu ai se feau aogā i le ola faatuatua mo lana aufaigaluega. Auā fai mai la latou tala, *“O ai ea lenei, auā ua usiusita’i ia te ia le matagi ma le vai?”* Peitai o le saunoaga a Iesu i lona au soo, *“O i fea ea lo outou faatuatua?”* O iina o loo avatu ai se faamanatu mo i latou ua fia mulimuli ia te Ia. E le o se vavega foi na mafua ona faia ina ia viia ai le mata’utia ma le ofoofogia o Iesu, ae o vavega na mafua ona fai e Iesu, e faavae lea i luga o Lona alofā i le tagata ua mafatia. Ioe, o upu ua fai ma matua o le lauga, o iina ua tatou mautinoa ai, o tagata o le malo o le Atua, o tagata e tatau ona malosi le ola faatuatua i le Atua.

O le isi lea feau taua o loo momoli mai i le tele o vavega sa faia e Iesu - o vavega e le gata sa faaolaina ai tagata mafatia, ae ia faamalosi ai foi le ola talitonu o lona au soo ia te Ia. Auā a oo ina mausalī le ola talitonu, o iina o le a faatuputeleina ai le ola faatuatua. Ioe, o le ola masalosalo o lona au soo ia te Ia poo ai Ia, o le mea lava lea sa silafia e Iesu, a o faagasolo a latou feau ma la latou galuega. A o le’i tuumuli Iesu ma lona au soo i luga o le vai, na Ia silafia lelei lava le loto masalosalo o Lona au soo ia te Ia. O le aso na saili atu ai lona tina ma ona uso e fia feiloa’i ia te Ia, sa le’i mafai ona maua se avanoa ona o le tumu o tagata sa si’omia Iesu i lea aso. Sa faailoa e le au soo ia Iesu, si ona tina ma ona uso o loo tutū i fafo, o loo fia feiloa’i ia te Ia. A o ni ā fā a Iesu? *“O ē faalogo i le afioga a le Atua, ma latou faia, o lo’u tina ma o’u uso lava ia.”* Lk 8:21. Fai mai ua masalosalo lona au soo, ma latou faapea ane, Aisea ea e tautala ai faapea lenei tagata? Ua lava upu nei a Iesu tatou te iloa ai, o lana faamanatu taua lea mo ona soo. O le a lea faamanatu? Ia fai le finagalo o le Atua ma ola ai! Ma o lana feau faamanatu lava foi leae tasi sa ia faailoa atu i lona au soo, a o aga’i atu la latou malaga i luga o le vai i le aso ma sosoo ai. Auā o le agi malosi o le matagi, ma le osofia o le vaa i le au peau na matua’i popole vale ai le au soo, ua matata’u ma ua fefefe.

O le mafuaaga lea sa latou fafagu ai ia Iesu, ma faailoa ia te Ia, o i latou o le a fano ona o le mata'utia o le matagi ma le vai. Ua tula'i Iesu ona Ia vavao lea i le matagi ma le vai, ona malū lea. Ua silafia e Iesu le atuatuvaale ma le popole vale o lona au soo, o le mafuaaga lena na Ia saunoa ai loa i upu nei, *O ifea ea lo outou faatuatua?* Fai mai la latou tuumumusu: O ai ea lenei? Auā ua fetalai o ia i le matagi ma le vai, ona usiusita'i ai lea ia te Ia? Ioe, o le mana ma le malosi o vavega sa faia e Iesu, sa faatino ina ia lavea'iina ai le tagata ua atuatuvaale ma popole vale le loto. E leai lava se faamoemoe o Iesu, a mea o vavega o le a faia, o le a faailoa atu ai i lona au soo lana pule ma lona malosi. O le fesili a Iesu i lona au soo, *O ifea ea lo outou faatuatua?* tatou te iloa ai, o le soo moni lava e fia mulimuli ia te Ia, o le tagata e ao ona ta'ita'iina lona ola i le Faatuatua faamaoni i le Atua. O faigamalo o le lalolagi ma le soifua tautua o ona tagatanuu, e faalagolago i le malosi o tupe, o oloa ma puna'oa mai ona laufanua ma le gataifale, faapea le malosi o le poto ma agavaa eseese, e faatino ai a latou auaunaga mo le manuia o le malo. Peitai le Malo o le Atua, o upufai, atina'e ma galuega a le Ekalesia, e tasi lava le malosi e faamoemoe i ai - o le malosi o le faatuatua, i le mana ma le alofa o le Atua

O le a sa tatou molimau i le tapuaiga i nei aso? O tumau ea le mamalu o le Atua i a tatou sauniga ma tapuaiga i le Atua? E ese lo'u faanoanoa pe a ou vaai i la'ei o loo fa'aaogaina e nisi tagata i sauniga lotu i nei aso. O se faataitaiga o lea manatu, o laei o i latou o loo fai ma ta'ita'i o si o tatou atunuu. O ni sauniga o ni Maliu, ma tapuaiga i malumalu, ae ua la'ei na o le ofutino e faavā le ua, ae fusiua i le 'ulafala. Ua peisea'i o ni tagata o loo i se fale kalapu e eva ma tafafao ai; ae o se itu e sili ona le talafeagai, o le la'ei mamalu lea pe a saofafa'i i le Palemene ia latou fonotaga. O se faataitaiga lelei ea lenei mo se atunuu e faavae i le Atua le Tama, le Alo ma le Agaga Paia? Vaai po o fea o i ai lo tatou faatuatua. Amene.

Saunia e Iakina Alefaio FS, EFKS Saanapu-tai Matagaluega Falealili Safata Siumu.

FAAMAVAEGA TEUTUPE EFKS

O le itula o le mapu ane teisi o galuega i le Aso Tofi, 18 Mati, o le laolao lea na faia ai le sauniga pu'upu'u ae mamalu i le Fogafale Ono, a le aufaigaluega o le Ofisa Tutotonu EFKS i Tamaligi. O le sauniga e faamavae atu ai i le susuga i le Faifeau Teutupe EFKS ia Rimoni Wright FS. O lenei faamavaega ua fai e tusa ma le I'uga Fono Tele Faafuase'i 2020, na talia ai le faamavaega a le afioga Teutupe mai lona tofiga, ina ua la'ua talia le valaau mai le EFKS Matautu Falelatai. Ua agavaa ai le susuga Teutupe e talia le valaau, ina ua mae'a ai le ulua'i nofoaiga mo 3 tausaga. O le susuga Tunumoso Soliola Iosia FT le Taitaifono Fono Tele EFKS sa taitaina lea sauniga na auai le afioga Sui Taitaifono Fono Tele, susuga Iosefa A. Uilelea FT, le Failautusi Aoao EFKS susuga Vavatau Taufao FS, o faauluuluga o Matagaluega taitasi ma le mamalu i alii ma tamaitai o le Ofisa Tutotonu (Ioane Viliamu, MAK, MPP, EFKSTV).

Sa fa'aaogaina le Tusi Faitau o lea aso, Galuega 12:1-19 Falepuipui ma le Tatalo, e aumai ai se feau faamalosi'au mo le susuga i le faifeau faapea le Ofisa atoa. O le tauiviga i le va o le malosi o le Falepuipui ma le malosi o le Tatalo, poo ai e sili ma manumalo. Ua iloa i le tala e ui ina malosi le falepuipui - Herota ma lona sauā, le nofoaga pogisā i ona pa ma faitoto'a, o leoleo ma filifili u'amea - ae sa le'i mafai e ia malosi ona taofi le malosi o Tatalo a le Ekalesia na auina mai ai e le Atua lana agelu e ta'ita'i ese ma faasa'oloto lana auauna. O le Tatalo le 'au'upega malosi e faatoilalo ai fili ma faafitauli, ae gafatia ai le galuega o faatali mai le EFKS Matautu Falelatai (o loo tausua e susuga A'oa'o Fesoasoani aofia ai lana afioga le Ao mamalu o le Malo, Tuimalealiiifano Vaaleto'a Sualauvi II), tainane i soo se tafa o le soifuaga nei. Ua malolo ai nei le susuga i le faifeau ma tapena ai mo la latou osiga feagaiga ua faamoemoe mo le Aso Tofi, 1 Aperila 2021 pe a aulia i le alofa o le Atua. O le susuga Failautusi Aoao EFKS na saunoa e momoli le faafetai i le Taitai o le Sauniga, ae maise le faafetai a le Ekalesia i le auaunaga a le susuga Rimoni, e le gata i lona tulaga faa-Teutupe 2015 - 2021, a o isi auala pei o le Su'etusi Faalotoifale ma Ofisa Aoao Kerisiano. Na tau'a'ao foi faiga meaalofa tupe ma fesoasoani tau palapalamalo, ona tualuga lea i le taumafataga taumavae fiafia. *Sasa'e sisifo toga poo matu, ua Ia silafia poo le fea itu. Pule mai lo'u Matai ou te faia pea, o Lou finagalo o lo'u loto lea.*

FAAU'UGA LONA SEFULU-AOGA TUSI PAIA MALUA

“O lenei, ia outou fusi a’e i sulugatiti o outou mafaufau, ia faautauta, ia atoatoa ona faamoemoe i le alofa tunoa e molia mai ai ia te outou pe a fa’aalia mai Iesu Keriso.” I Pete. 1:13.

O Afioga paia ia a le Atua na faatomua ai e le Taitai o le Sauniga, susuga Asotasi Gu Time FT, le Taitaifono Komiti Malua, le sauniga mamalu o le Faau’uga lona sefulu a le A’oga Tusi Paia a Malua, na faia i le Iupeli i le Aso Toonai, 13 Mati’21. O susuga Fili Matalavea FT na faitauina le Tusi Paia (Ioane 21:15-17), Amuia Seuala FT na saunia tatalo, ma le Lauga na saunia lava e le ta’ita’i. O viiga o le Atua na ta’ita’iina e le Kolisi Malua. Na auai ma molimauina e afioga Taitaifono ma le Sui Taitaifono Fono Tele, sui o le KMTA, Toeaina galulue ma Toeaina Penisione, le aufaigaluega faifeau, faatasi ma le vasega o Faletua, ae maise le mamalu i aiga ma Aulotu. O le faau’uga na molimauina ai le mafuli o le toatele i sui mai le Matagaluega Faasaleleaga. Ae le gata i lena, ae le’i faapito foi i le EFKS, ae peitai sa i ai ma sui mai isi ituaiga - Ekalesia Metotisi, PIC, Mamona, Worship Center. O le susuga Maafala Lima FS le Pule o le Kolisi Malua na saunua i le Tala o le A’oga Tusi Paia a Malua:

Na amata i le tausaga 2007 ona o mau mai Matagaluega na pasia e le Fono Tele, ina ia fai se Aoga Tusi Paia mo tagata lotu o le EFKS. Na amata i Malua e tausavali i ai i latou fia a’o’oga 5-7 afiafi. O le ulua’i faauuga sa fai i le 2009, o le 2013 na siitia ai i Apia. Aso 19 Fepuari 2016 na faatu ai le Aoga i Savaii, e 38 alii ma tamaitai na amataina. O le tausaga 2020 na tatala ai le Apitaga mo Faiaoga na fausia e le Matagaluega Faasaleleaga. O le masina nei o Mati 2021 ua i ai le faamoemoe e tatala ai le Lala i Sini Ausetalia. E 4 vaega tetele o Su’esu’ega:

(i) Suesuega Tusi Paia (ii) Mataupu Silisili ma Aoaoga FaaKerisiano (iii) Tala Faasolopito o le Ekalesia (iv) Misiona ma Talaiga. E 2 ituaiga/laasaga o tusipasi:

(i) Tusi Pasi i Mataupu Silisili - 10 Mataupu
(ii) Tipiloma i Mataupu Silisili - 10 Mataupu.
Ua fai le aiaiga o le a siitia lenei numera o mataupu mai le 10 i le ta’i 15 mataupu. Sa ta’ua faapitoa ma faafetai i le faiga paaga ma le Matagaluega o Tusi Pasi Aloaia a le Malo (SQA), lea ua aloaia ai Tusi Pasi o le Aoga Tusi Paia Malua. O loo siisii pea i luga le aofai o i latou e fiafia, resitara ma auai i lenei faamoemoe, vagana le tausaga 2020-2021 ona o aafiaga o le Faama’i Koviti-19, e 126 na resitara,

ae uma ane toe 86, o le 43 o i latou e mai Salafai. O nisi o Matati’a ua ausia i lenei Faauuga lona Sefulu:

(i) O le Faauuga aupito toatele lenei talu ona amata.
(ii) Ua faau’u ai sui mai Savaii i le Tipiloma
(iii) O le faauuga mulimuli i le ta’i 10 mataupu
(iv) E 12 Tina ma Tamaita’i (E au le inailau a Tina)
(v) E to’a 5 ulugalii faauu faatasi
(vi) O lona 2 lenei o faauuga i le Malumalu Iupeli
(vii) O le faauuga mulimuli a le susuga i le Sooupu o le Aoga Tusi Paia, susuga Latu Latai FS - ua faamaonia e le Komiti Malua le faamatu’u atu o le Faia’oga e tali le valaau mai le EFKS Apia.
(viii) O le faauuga mulimuli a le susuga i le Alii Pule o Maafala Lima FS, ua faamaonia e le Komiti Malua le faamatu’u atu o i la’ua ma le faletua ia Lalokava e tali le valaau mai le EFKS Otara, Manukau.
(ix) O se tasi o le au faauu, afioga Mulinu’u Tapulesatele AF, EFKS/PIC Niu Sila, sa le mafai ona auai mai - na talia e Leaso Tupa’i FT lona Tusi.
(x) O se tasi o sui, Lumaupolu Ropati Eteuati AF EFKS Saasaai, ua maliu ae faamaonia lona agavaa e faau’u - na talia e le sui o lona aiga lona Tusi Pasi; sa faia foi le tula’i filemu e fa’aalologia ai.
Na matua le Lauga i le Ioane 21: 17e, *“Ona fetalai atu lea o Iesu ia te ia, “Ia e fafaga i a’u mamoe.”* ma le faamamafa a le TFA i lea aso, O LE ALOFA E SILIATU NAILO UPU. O le faamalosi’au mo le ‘au faau’u ma le faapotopotoga, mai le fa’aaliga o le Keriso Toetu ia Peteru ma le au soo i luga o le Vai o Tiperia. Ina ia mulimuli ma solisoli mulivae i le faata’ita’iga ua la faia, e pei ona maliu tiga ai e faatino lona alofa moni mo le lalolagi. O i latou ua faau’u nei, e ta’ua o mamoe i le galuega a le faifeau ma lona faletua; peita’i e aofia foi i latou uma nei (A’oa’o Malua, A’oa’o Fesoasoani, Tiakono, Faiaoga Aso Sa, Tagata Lotu) o le aufaigaluega faatasi ma Toeaina ma Faifeau, i le galuega o le leoleoina, tausi ma fafaga i le lafu mamoe a le Atua i lotoā taitasi ua valaauina ai. Sa faapea foi ona maua le avanoa e tali fuaitau ai le ‘auga o aute o le aso, e ala i lo latou sui tofia ia Lulu Unasa Taiese Soana’i ina ia faaleo le faafetai tele i le paia o le Ekalesia, mo le tofa ma le utaga i lenei polokalame ua fa’aupega ai i latou mo le soifua molimau ma tautua mo le Tala Lelei. Na faai’u le aso i le tausamiga fiafia na saunia e le afioga i le Faifeau Pule ma le Laumua ia Malua, mo le au faau’u, le Taitai Sauniga ma Toeaina, ma le mamalu o aiga, Ekalesia ma le atunuu sa faatasi ai i lea aso fiafia. Ia i le Atua lona viiga ona o le faamoemoe ua taunuu.

LISI O LE AU FAAU'U 2021 - AOGA TUSI PAIA MALUA

Cert. in Theological Studies Level IV

1. Alaalatoa Alalise Peni TK EFKS Fogapoa/
Tuasivi
2. Asomualemalama Tupufia Ualesi, Fautua
Mauluga, LDS Saipipi
3. Douglas Ofisa Tomane AF, EFKS Aleisa Sasa'e
4. Faamafu Umaga Setefano, Faletua TK EFKS
Leulumoega
5. Faitele Pauina Nanai FF Ekalesia Metotisi
Gataivai
6. Laifaga Laifaga AM EFKS Faga Amoa
7. Muagututi'a Talaleu Arasi Faapito, Faiaoga Aso
Sa, EFKS Saipipi.
8. Mulinu'u Tupavaililigi Sae Tapulesatele AF,
EFKS/PIC Niu Sila.
9. Mulitalo Feterika Mulitalo AF EFKS Lano.
10. Rosalina Sitiveni, Faiaoga Aso Sa, EFKS Lano.
11. Saunimaa Ma-Fulu-Aiolupotea Fiu Kolia TK,
EFKS Vailele, Papa Sataua, Sili, Fusi Saoluafata.
12. Talatau Tiitii AF EFKS Luua Faga.
13. Tauva Esera Faletua Tiakono &
Faiaoga Aso Sa, EFKS Saipipi.
14. Tipa Iosefa Lualua Aati TK EFKS Solosolo.
15. Togafau Afatasi AF EFKS Moataa.
16. Tupuimatagi Palanitina Toelupe TK Tamaitai,
EFKS Vailele.
17. Unasa Faaetia Elizabeth Ah Poe, Faiaoga
Aso Sa, EFKS Leulumoega.
18. Usumanu Su'a AF EFKS Faiaai.
19. Vaifale Puleiata Akisa AF EFKS Samalaeulu.
9. Lualua Namulauulu Tautu AF EFKS Asaga.
10. Lumaupolu Ropati Eteuati AF EFKS Saasaai.
(Ua Maliu)
11. Mafuvao Puni AF EFKS Saipipi.
12. Magele Liligi Faanunu Tagata Ekalesia,
EFKS Saasaai
13. Mailata Hemi Siaosi TK EFKS Vaitoomuli.
14. Makesi 'Aiva Namulauulu AM EFKS
Fogapoa/Vailoa Tai
15. Misiperetiso Lolenese Faiaoga Aso Sa,
EFKS Tafua-tai.
16. Namulauulu Lauaki Fuatau AF EFKS
Foua Salelologa.
17. Niui'a Faagu Ulimasao AF EFKS Saipipi.
18. Papali'i Li'o Ta'eu Masipau AF EFKS Sapapalii
19. Poufa Poufa AF EFKS Vailoa, Palauli.
20. Seve Talalafai Luki Faifua TK, EFKS Iva.
21. Solotete'e Toalepai, Tagata Lotu,
EFKS Tafagamanau.
22. Togisia Fatu Malaefono AF EFKS Fa'ala.
23. Tuamasaga Salu Mika AF, EFKS Tafua-tai.
24. Tuialii Tagataesesolomona Akeripa Toesos AF,
EFKS Fusi, Safotulafai.
25. Tuilagi Vaivai Tauiliili AF, EFKS Fatausi.
26. Unasa Paeu Talatonu Vaafusuaga AF, EFKS
Si'ufaga, Amoa.
27. Va'i Faimalōmatumua Palepua Solaese, Failauga
Faamaoni, Metotisi Faatoia/Matafele.
28. Vaigā Siaki TK, EFKS Saipipi.

Ulugali'i Faau'u:

Diploma in Theological Studies Level V

1. Ariu Toleafoa Talitimu AF EFKS Luua Faga.
2. Faalogo Taamilosaga Tapuala Lolagi AF, EFKS
Foua, Salelologa
3. Fa'imanu Toesea AF EFKS, Fogatuli.
4. Faamafu Umaga Setefano Faletua TK, EFKS
Leulumoega
5. Faatoatoa Latū Niupulusū Emelio AF, EFKS
Vaitoomuli
6. Fuavasa Faigafou Amataga TK EFKS Lano.
7. Itaimatagofieaioevaga Rimoni Faiaoga Aso Sa,
EFKS Saasaai.
8. Letoa Ropati Tuimauga Faiaoga Aso Sa,
EFKS Fagafau.
29. Fiu Tagaloasā Sapa AF, EFKS Iva.
30. Ana Atonio, Faletua AF, EFKS Iva.
31. Fiu Logologo Seiuli Asotasi, Tagata Lotu Vaivase
32. Blessing M. Asotasi, Faletua, Worship Centre
33. Lauulu Unasa Taiese Soana'i AF, EFKS L/lava
34. Taiaopo Taiese Soana'i, Faletua AF, Lalomalava
35. Magele Hoe Viali, Tagata Lotu, EFKS Lotopa.
36. Faapaologa Fabie Viali Tgt Lotu Worship Centre
37. Sefo Tafili Sefo TK, EFKS Asaga.
38. Moana Taua Sefo, Faletua TK, EFKS Asaga.

“E tele le saito e seleseleina, a o le aufaigaluega e toaitiiti ia..Ina o atu ia..pei o tama'i mamoe i le va o luko. 'Aua tou te ave se ete tupe..Tou te mua'i fai atu, Ia manuia le aiga nei. Pe afai o i ai le tagata o le manuia, e oo atu ia te ia la outou faamanuia; a leai, e toe foi mai ai ia te outou, tou te faapea atu, O le eleele lava ua pipii mai..matou te sōloi atu...” Lk.10:1-12.

MALUMALU SASINA: PETELI O LE FALE O LE ATUA

“O lo tatou fesoasoani o i le suafa o le Alii lea, o Le na faia le Lagi ma le lalolagi... Afai e le atina a’e e le Alii le fale, e galulue fua o e atina a’e.”

O le susuga Toeaina o le Pulega Gagaiformauga, Tanielu Apineru FT na taitai le sauniga na faapaia ai le malumalu fou o le EFKS Sasina, o PETELI O LE FALE O LE ATUA. O Susana Soliola na ooti le lipine, o susuga Afatia Afualo FS (Fagae) na faitauina le Tusi Paia, o Anthony Kosena FS (Paia) na saunia Tatalo, o Vavae Maua FS (Samauga) na saunia le Lauga, ma le Sakarameta o le Faamanatuga na taitaiina e le Toeaina ia Apineru, ae tautuina e le aufaigaluega faifeau o le Pulega. O Pese na saunia lava e le Aufaipese EFKS Sasina. O le feagaiga taulagi a le Ekalesia, susuga Panapa Too FS (lona faletua o Leafā) na saunoi i le Tala o le Galuega. O le igoa lava lea o malumalu muamua e 3 talu mai le 1833 na faavaeina ai le Ekalesia i Sasina, o loo fa’aauu pea ona faasuafa ai ma manatua ai pea le aufaigaluega na asaina le gasū o le galuega. (O le Sulu Samoa Iuni 2020 o loo auiliili ai le tala faasolopito o le Ekalesia, i ona malumalu ma lana aufaigaluega faifeau tuufaasolo).

O le aso 8 Iulai 2020 na faapaia ai le eleele ma amata ai le galuega, e le afioga i le Matuaofaiva ia So’oalo Faamanū ma le Falefa o le Aiga Salemalama mai le afioaga o Samauga; o le galuega e 138 aso faigaluega na fausia ai. O le faatupeina o leni galuega: Tupe na aoina e Matafale ma le Aulotu e \$150,000 O le Toomaga mai le Ekalesia e \$50,000, Mafutaga Alo ma Fanau i Aukilani \$151,744, mai Ueligitone e \$70,000, maua ai le aofaiga e \$421,744. O le tau aofa’i o tauofoga eseese e \$375,362; o le tau o le fesoasoani mai a le afioga Leatigaga Peni i masini e \$20,000, maua ai le aofaiga atoa o le tau o le Malumalu e **\$817,106.00**. O le Afioaga Taitaifono Fono Tele ma le Faletua na ofoina le Laulau ma Nofoa o le Faamanatuga e \$5,000 lona tau. O Leasi Vainuupoma le aiga (faavae mai le Metotisi) na ofoina ‘apa ma alavai i le tau e \$35,000. O le afioga i le Sa’o ia Togoi’u, o Minisita ma Faipule o le aiga i Vailliili na ofoina le Maa/Tiles o fola ai le malumalu e \$33,000. O le afioga i le Fa’aaloaloga ia Vagana ma le aiga na ofoina le Piliki atoa o le galuega e \$32,000. Tama ia Lealofi ma aiga e 2 faitoto’a i

autafa ma le isi 4 i tua, ma Ili e \$18,000. Afioaga ia Faafili ma le aiga na ofoina Ea Malulu e \$22,000. O le faitoto’a tele i luma na ofoina e le tama ia Fesaga ma Failua ma le fanau. O le au aiga Vaetoeifaga Silitō na ofoina le tasi faamalama \$7,000 ma leisi e \$6,000. O le afioga Tevaga ma Punavai ma le fanau le isi faamalama i fafo e \$6,000. O alo ma fanau a le tina ia Sugalu ma Leasi Sulepa na ofoina le Masini Faaleotele Leo i le tau e \$12,000. O le faletua ia Faafou Leasi Misiuepa ma le fanau o le moli tele e \$12,5000. O alo ma fanau a le Ekalesia/afioaga o loo alaala ma galulue i Apia na saunia Faamalama ma Ata e \$52,000. O nisi alo o le Ekalesia i Apia ma Niu Sila na latou saunia le Pulelaa Laititi mo folafolaga. O le susuga i le faafeagaiga ma le faletua ia Leafa ma le fanau na saunia Moli o le malumalu e \$12,000 le tau. O Leituala Too Leasi ma le aiga na ofoina Ipu o le Faamanatuga e \$6232.

O nisi o ofo iloga mo le galuega i Sasina, e aofia ai le fanua ua ofoina mo le Malumalu o le Atua, mai le aiga o suli ma feoi o Vagana Sinei. E faapea foi ona toe faamautu ai le fanua ua ofoina mo le Fale o le Faifeau ma le Maota o le galuega, e le aiga o Togoi’u Misiki. O nofoa o le malumalu na fausia mai le ma’au agalelei o asiga o le galuega e le aufaigaluega i Toeaina ma Faifeau @ \$2,000/\$1,000, ma le Tina ia Faamanū ma ana fanau e \$10,000, o fanau a Epenesa Stanley \$5,000. O le afioga Laaulialemalietoa Leuatea ma le faletua na ofoina nisi moli ma faamalama. O le Pulelaa ma Vali na ofoina e le susuga A’oa’o Fesoasoani, le Tina ia Sala ma le aiga e \$21,000 ma nisi nofoa \$3,000. O le susuga Taitaifono Fono Tele na faaleoina le faamalo ma le faafetai a le Ekalesia Aoao mo leni galuega tele, ae maise i latou na ofoina le tele o vaega. Na ia toe faamanatu le tulafono faavae o le alofa, e te alofa i le Atua i lou tagata atoa, e te alofa foi i lou tuaoi. O leni ua molimauna le alofa o le EFKS Sasina i le Atua faapea le EFKS. Ia saga faamanuia mai o Ia e tusa ma galuega o le faatuatua ua faia. Ona tauaao lea o le meaalofa masani a le Ekalesia e \$20,000. Na faai’u le aso i le tausamiga tele ma fa’aaloaloga mauualuluga. Malo le galulue, ia i le Atua lona viiga.

OSIGA FEAGAIGA EFKS SALEILUA, FALEALILI

“Totofi ia mo a’u o Panapa ma Saulo i le galuega ua ou valaauina ai i la’ua.”

O le sauniga o le osiga feagaiga a le EFKS Saleilua Falealili ma la latou faifeau, susuga Risati Taua FS ma le faletua ia Suitupe, na faia i le Aso Lua 30 Mati 2021, na taitaiina e le susuga Tunumoso Soliola Iosia FT le Toeaina o le Pulega Falealili, KMTA Matagaluega Falealili Safata Siumu, a o le Taitaifono Fono Tele EFKS 2021. O susuga Vaigafa Paleono FS (EFKS Vaovai) na saunia Tatalo, a o Aмоса Vaetoe FS (EFKS Matautu, Failautusi Pulega Falealili) na faitauna le Tusi Paia ma fai le Lauga. O le susuga Touli Toaselau AF na fai ma sui o le Aulotu e molimau i la latou filifiliga, lea sa faamoemoe ma faalagolago i le faasinoga a le Atua. Talu ona tuua le galuega e le faifeau talu ai, susuga Iakopo Pese FS ma Seutatia, sa anapogi ma tatalo le Ekalesia i le Atua e faasino mai so latou tofi. E tele nisi faifeau sa manatu i ai, peitai ua i’u le filiga i le faifeau sa galue i le Ofisa Tutotonu o le Ekalesia i le vaega Faamisionare. Na tali fuaitau le susuga Risati e tusa ma la la’ua foi faiga filifiliga e talia le valaau, aua o le autu lea na a’otauina ai i Malua mo le galuega o le Tala Lelei. Na ia faafetaia ai le faatofalaiga a le Ekalesia, ma o le a taumafai i le mafai e gata ai, ina ia fai le galuega mo le manuia o le soifua faaleagaga o le fanau a le Atua, ma ia viia ai lona suafa e faavavau.

Na faamamafa e le Failauga o le aso le valaauina o Panapa ma Saulo mo le galuega i Maketonia e faavae ai se feau faamalosi mo le faifeau ma lona faletua faapea foi le Aulotu. E filifilia e Iesu tagata ma latou taleni eseese (faifaiva pei o Peteru ma Anetere’a, ao lafoga pei o Mataio, faaofisa/teutupe pei o Iuta, fiatfita pei o Simona le Kanana), ina ia fa’aaoga mo lana galuega mo agaga o tagata. Sa tatalo foi ma anapogi aiganalua ma le Ekalesia, lea ua totofi i la’ua mo le galuega, ia fai i ai le fai mea lelei mo le viiga o le Alii. Sa faaopoopo foi le Toeaina ta’ita’i i fautuaga i le amio, le galue ma le soifua fesoota’i o le faifeau ma lona faletua i le Toeaina ma le aufaigaluega o le Pulega/Matagaluega e mafanafana ai le galulue faatasi ma le fealofani. O le afioga Seuamuli Fasi Toma (Tiakono Toeaina Itu o Tane) na fai ma sui o aiganalua e faailo le le o le Feagaiga na saunia e aiganalua. O le susuga Risati o se lupe faalele mai afioga o Paia,

Samauga, Lalomalava ma Fusi Safotulafai, a o le faletua ia Suitupe o le taulaga soifua a afioga o Tuanai ma Sasina. E valaau mai le Ekalesia i Saleilua o galulue i la’ua o Faifeau Tausi Aiga i le EFKS Tuana’i, Matagaluega Malua. Na i’u mai Malua i le 2017, faigaluega Ofisa Tutotonu ma faau’u ai i le tofi Faifeau Samoa (FS) ia Aokuso 2020. Na taualuga le sauniga i le Talisuaga Paia a le Alii, na taitaiina e Risati Taua FS, sosoo ai ma le tausamiga fiafia ma fa’aaloaloga masani, ona tuumuli lea ma le agaga faafetai o le mamalu i le aufaigaluega, a o alo ane le afioga i la latou usu fa’aaloalo, faapea le fesagaiga a aiganalua ma le mamalu i le EFKS Saleilua Falealili. O le faifeau o Iakopo Pese ma Seutatia sa galulue talu ai (2010-2020), o tua atu sa i ai Lualua Meni Tanielu (1990-2009) ma Faaauga Mata’utia ma Maima. Ia manuia le galuega lau susuga Risati ma le Faletua (o lo la’ua ata i le itulau 16).

TATALA FEAGAIGA EFKS LETOGO & LALOMANU

O se tulaga faanoanoa ae ua lē ma’alofia, le tatala ai o feagaiga na osi a nisi Aulotu ma latou faifeau i le faai’uga o lenei masina. O le Aso Faraile 26 Mati na tatalaina ai le feagaiga a le EFKS Letogo, Pulega Vaimauga Sasa’e ma lo latou faifeau o Lavilavi Soloi FS ma le faletua o Asolelei. O le toe foi mai o le malologa a le faifeau ma le aiga sa fai mo le 3 masina, ae fetaia’i ma le tala faanoanoa, ua tasi le faatofalaiga i le Ekalesia ua tataua ona tatala la latou feagaiga, ona o ni mafuaaga ua tataua ai. O le susuga Aila Patea FT na taitai le sauniga e tatala aloaia ai lea feagaiga sa auai ma molimau le aufaigaluega o le Pulega. O le susuga Lavilavi na i’u mai Malua ona galue lea i le Ofisa Aoaoga Kerisiano o le sui o le Matagaluega Faasaleleaga seia oo ina valaau e le EFKS Letogo. Ua toe foi atu nei le faifeau, le faletua ma le fanau i lo latou aiga i Iva, Faasaleleaga.

O le Aso Gafua 29 Mati na tatala ai foi le feagaiga a le EFKS Lalomanu, Matagaluega Lotofaga Lepa Aleipata, ma lo latou faifeau susuga Etisone Tinetali Gafa FS ma le faletua ia Henrietta. O le Toeaina o le Pulega Aleipata, Timoteo Momoemausu FT na taitai le sauniga na tatala aloa’ia ai la latou feagaiga, a o molimau le Pulega sa auai ai. O le susuga Etisone ma Henrietta sa galulue faamisionare i Jamaica ina ua i’u mai Malua i le 1989, toe galulue i le EFKS Mt. Roskill Aukilani ae faai’u ai i Lalomanu ina ua maliu le susuga Toeaina Isaiia Pisa Tiatia FT. Ua toe mapu atu nei i latou i le aiga.

UMUSAGA EFKS SATALO

“Tou te le iloa ea o le malumalu outou o le Atua, o loo nofo foi le Agaga o le Atua i totonu ia te outou?” 1 Kori.3:16.

O le sauniga na faapa'ia ai le Maota o le Galuega fou a le EFKS Satalo, sa ta'ita'iina lava e le toeaina o le Pulega Falealili, susuga Tunumoso Soliola Iosia FT, le afioga Taitaifono Fono Tele 2021. O le Aso Toonai, 6 Mati 2021 na faataunuu ai le faamoemoe o le susuga faafeagaiga ia Fuata'i Simanu ma le faletua ia Aotumua ma le mamalu i le Ekalesia i Satalo. Na muamua 'o'oti le lipine e le Faletua o le Sui-Taitaifono Fono Tele, afioga ia Teki I. Uilelea, ona tatala lea o faitoto'a ma ulufale atu le Taitai o le Sauniga ma le mamalu o le au valaaulia - o susuga Toeaina galulue ma Toeaina Penisione, faafeagaiga ma faletua o le Pulega, o ana taulaga soifua ma lupe faalele, o le mamalu i le afioaga ma le EFKS Satalo. Na saunoa le faafeagaiga susuga Fuata'i Simanu i Tala o le Galuega: O le fale tuai ua 67 tausaga na tala i lalo Oketopa 2020. O tupe na fai ai lenei galuega e aofia ai le \$151,000 na saili ma faaputupu e le Ekalesia i auala eseese, e \$90,000 la latou tupe na teu i le UTOS i le 2017 lea na tala mai, e \$24,500 na maua mai mafutaga a alo ma fanau a le Ekalesia i fafo, e \$50,000 le Toomaga mai le Ekalesia Aoa, e \$30,000 le Sene e ao ma faaputu i Aso Sa taitasi. O le tau atoa o le galuega e **\$313,826.81**. O asiga o le galuega na maua ai le \$25,000, ma e faitau atu tupe na totoe i lea aso e \$58,000 - o le a totogi ai le Toomaga, ma mamā atu ai e leai se aitalafu o totoe o le galuega. Na ia faafetaia ai le Toeaina ma le Pulega, o aiga ma uo ma i latou uma sa agalelei atu. E tele foi aiga o le Aulotu na ofoina atu nisi vaega pei o faamalama ma 'ie faamalama. Ia viia le Atua e ala i le alofa ma le agalelei ia te Ia ma ana feau.

Na saunoa le afioga Taitaifono Fono Tele 2021 e momoli le faamalo ma le faafetai i le susuga faafeagaiga ma le faletua ma le paia o le Ekalesia Satalo, ona o lenei galuega tele ma le matagofie ua latou faia mo le Atua. Ua sa'o lava upu o le itumalo, Ua ta fia Falealili fua, i le soifua faatuatua ma le ola galulue o le Ekalesia Satalo. Na tauluga le saunoaga a le Taitaifono Fono Tele i lona tauaao atu o le meaalofo \$10,000 mo le Ekalesia, e tusa o ana Iugafono Tumau ma lona Faavae. Tau ina ia aogā lenei galuega mo feau a le Ekalesia, ma ia i le Atua Lona viiga ona o le soifua tautua tuavae mo Ia.

GALUEGA EFKS AFEGA

O le susuga Luapene Gataivai Nepo FS (faletua ia Faaolataga) le Faafeagaiga taulagi a le EFKS Afega na taitai le sauniga e faapaia ai le fanua mo le fausia o le Maota fou o le Galuega (New Multi-purpose Hall) o la latou Ekalesia i le Aso Faraile 19 Mati 2021. O le sauniga sa auai sui o le Konekarate e fausia le galuega, le Zheng Construction, ma sui o le Ekalesia ma le afioaga i Afega. O lea lava sauniga na sainia ai le feagaiga ma le konekarate, le afioga i le Matua o Faiva ma le Falefa o le Aiga Salemalama, o le a nafa ma le galuega lea ua faamoemoe e faia i le 5 - 6 masina. E **\$700,000** le tau atoa o le galuega, ua faatupeina mai se nogatupe mai le Samoa Commercial Bank, o loo faamalumalu ai le EFKS e \$200,000; e faaopoopo i atina'e ma sailiga tupe a le Ekalesia i auala esseese ua masani ai Aulotu, ma fesoasoani mai Mafutaga a alo ma fanau a le Ekalesia/afioaga i atunuu i fafo. O le nofoaga sa i ai le maota tuai o le galuega ua tuuina i lalo, ua faamoemoe e toe fausia ai le maota fou.

E tusa ma le molimau a le susuga i le faafeagaiga ia Luapene Gataivai, o lona maota muamua o le galuega sa fausia i le tausaga 1953, a o galulue ai le susuga i le Toeaina o Siitia Siitia FT ma le faletua ia Malele talu mai le 1949, seia oo ina malolo i le 1981 ona o gasegase. O le tausaga lava lea 1981 na valaauina ai le susuga Togamau Nepo FS ma lona faletua ia Faagotolā e fa'aaauu ma sosoo le galuega i Afega, seia oo ina malili le faifeau i le masina o Fepuari 1997 (sa lagomau ai i le fanua o le EFKS Afega, ae ua liutofaga i lona aiga ona o le galuega o le maota fou). O lea lava foi le tausaga 1997 ia Oketopa na valaauina ai loa le susuga Luapene Gataivai ma Faaolataga Nepo e sui tulaga i lona uso matua, le faifeau ia Togamau Nepo FS. O Togamau ma Gataivai Luapene o ni alo faasino i le susuga i le Toeaina ia Nepo ma Leinati Liufau, sa galulue muamua i le EFKS Vaiee 1953 - 1962 (fanau ai Togamau), toe galulue i le EFKS Gataivai, Amerika Samoa (1962 - 1968 na fanau ai Luapene) ma toe fa'aaauu i le EFKS Vaiee se'ia oo ina malili le toeaina o Nepo i le 1990 o loo lagomau ai i Vaiee. O Luapene na i'u mai Malua 1987, sa sikolasipi a le Ekalesia, foi mai avea ma Faatonu Aoaoga Kerisiano seia oo ina valaauina e le EFKS Afega. O loo avea nei i la'ua ma Failautusi o le Pulega Malua Sasa'e faapea le Matagaluega Malua. Ia manuia le alo faiva o le Matuaofaiva, faapea le tapuaiga mau a le Ekalesia, i le faatasi mai o le Alii le Mataisau.

O A TATOU MEA'AI E TATAU MA LE ASO

O LE VAIASO PAIA: I TOTONU O LE LĒ MAILLOA: O LE AGAGA FAASO'O 7 – O LE TAU O LE ALOFA

Aso Sa o Laupama, 28 Mati 2021

Tatalaina o se Auala fou

Tusi Faitau: Salamo 118:1-2, 19-29 *“¹⁹To mai ia ia te au o faitotoa o le amiotonu; ou te ulufale atu ai, ma ou vivii atu i le Alii. ²⁰O le faitotoa lenei o le Alii, e ulu atu ai e ua amiotonu.”*

Sa ou 'elia se fanua fou e totō ai ni laau 'aina. O le eleele mamafa e tele ni masina e faaliliu ai ia avea ma palapala lelei mai vao ma mutia. Ae o se uluai laasaga lea e tatau ona fai. O le 'eliina muamua ma le tīgā o le tua e maua ai, o ni tulaga faailoilo o a'u tauiviga ma le palapala, e a'afia ai le suō ma le afu sisina. O le fausia o avanoa fou mo faamoemoega fou e masani ona aofia ai le ola tauivi, ma e lē aunoa le i ai o sauāga ma tīgā. O loo fa'aaogā e le Fai Salamo ata eseese mo amataga fou: o le aso ua faia e le Alii, o le ma'a na tuulafoa'iina e tufuga fau fale ua avea ma ma'a tulimau aupitoaluga, ma le tōina o faitoto'a o le amiotonu. O le malaga atu o Iesu i lona maliu, o loo folasia e lē gata o laupama ae faapea foi i tīgā ma sauāga. I lenei vaiaso, e tele ni mea o le a saelua ina ia tatala ai se avanoa fou. O le tōina o faitotoa o le amiotonu ina ia fa'aalia le alofa tutumau o le Atua, e lē o se mea e faigofie ona fai i totonu o se lalolagi ua maua'a lona tete'e i ai. O lona silafia o le mea e ao ona fai, na tauivi ai Iesu i Ketesemane ma le finagalo o lona Tamā ina ia tatalaina ai se avanoa fou mo le lalolagi. Ua nofo sauni Iesu ma lona loto i ai, e tauivi ina ia tatalaina atu faitoto'a, talia puapuagā o le avea ma ma'a tuulafoa'iina, ma amata ai le aso fou ua faia e le Alii mo le lalolagi.

†Le Alii e, i lenei Vaiaso Paia, aumai ia i matou le lototele e mulimuli ai ia Iesu, a o matou malaga ma Ia aga'i i Lona faasatauroina ma lona tanuga. Amene.

Aso Gafua, 29 Mati 2021

O le Vevesi na mafua mai le Mesia

Tusi Faitau: Mare.14:53-65, *“⁶⁰Ona tu lea o le ositaulaga sili i totonu, ua fesili mai ia Iesu, “E te le tali mai ea sina upu? Pe se a le mau a nei tagata ia te oe?” ⁶¹A ua le fetalai o ia, ua leai foi sana tali. Ona toe fesili mai lea o le ositaulaga sili ia te ia, “O oe ea o le Keriso, o le Alo o Lē viia?” ⁶²Ona fetalai atu lea o Iesu, “O a'u lava lea.”*

O le sefulu tausaga talu ona ou lagona le valaau i le misiona, lea sa ou te'ena, na ou faalogoina ai le faatasi mai o le Atua i a'u tatalo, ma e peiseai sa soiso mai le Atua ia te au. Sa ou fuafua e avea ma Pātele Katoliko i se monasari ae peitai, sa ou lagona ma le mautinoa sa fetalai mai le Atua o le a avea a'u ma faifeau Metotisi! O lenei feiloaiga ma le Atua sa faatupuina se vevesi i totonu o a'u. Sa ou lē iloa pe faapefea ona matala mai le ala mo a'u, peita'i, o a'u lenei! O le i ai o le Atua i le laau talatala sa mū, na ia faafetaia'i Mose ma le galuega faigatā o le ta'ita'i ese o Isaraelu mai le pologa. O le “o a'u o lē ola” na tatalaina le auala. O le “o a'u lava lea” a Iesu i fuaiupu faitauina ua na tatala le auala mo se faiā e faia suiga ma Lē viia. Na taunuu Isaraelu i le Nuū Filifilia, faapea le au soo na taunuu i Ierusalema, ae o le isi laasaga—o le toe foi i se faiā e lē toe motusia ma le Atua—sa fai sina faigata. E tele mea sa faalavelave i le ala. Ina ua afio mai Iesu ma fetalai, “O a'u lava lea”, na vaaia o ia e le Ositaulaga Sili. Na ia faalogo i lana mau. Ma na te le'i toe manaomia se faamaoniga. Ua fai mai lenei tagata o Ia o le Mesia, le Alo o Lē viia. O le vaaia o Iesu, ua na faatupu le vevesi mo le Ositaulaga Sili. Ua na saeia ona 'ofu—o le faailoga faalelotu lea e iloa ai ua i ai se upuvale i le Atua. I mata faalelotu o le au Faresaio, o le upuvale le mea lenei. Peitai i mata o le faatuatua, i le vaai mulimuli ane, tatou te iloa ai o Iesu e lē o se tagata upuvale. O le upu moni, o le faiā ma Iesu e faatupuina se vevesi, auā o lona “o a'u lenei” na te tatalaina le ala i le Tamā.

†Iesu le Alo o le Atua soifua, o le puna ma le malamalama o matou ola, fesoasoani mai ia matou vaaia lau afio e pei ona e i ai, tusa lava pe faatupu ai se vevesi i totonu o i matou.

Mo Mafaufauga Atili: E mafai ona ou vaaia le “O A'U O LĒ OLA” a le Atua i nisi tulaga ou te lagona ai le fefe ma le to'atasi?

Aso Lua, 30 Mati 2021

Ua Magoto Peteru

Tusi Faitau: Mareko 14:66-72, *“⁷¹Ona augani lea o ia ma tautō, ua faapea, “Ou te lē iloa lava lea tagata tou te fai mai ai na...” ⁷²Ona manatua lea e Peteru o le upu na fetalai atu ai Iesu ia te ia, “E lē vivini faalua moa, seia e faafiti faatolu mai ia te au.” Ona matuā tagi tele ai lea o ia.”*

O A TATOU MEA E 'AI E TATAU MA LE ASO

Ou te manatua i lo'u laitiiti na ou vaaia ai se ata na vali o Iesu, e peisea'i o loo Ia vaai ia Peteru ma foliga o le inoino ma le fia faasala. Lata mai nei, ina ua ou fesaga'i ma se tasi na maua o gaoui, na faamanatu mai ai ia te a'u, e masani lava e lē o le inoino e lē o le faasala foi e maligi ai loimata o tagata, ae o le alofa ma le faamagalalo. A o o'u si'i mai le Tatalo a le Alii, *'Ia e faamagalalo ia te i matou ia matou agasala, e pei o i matou foi ona matou faamagalalo atu i e ua agaleaga mai ia te i matou'*, o loimata na mulimuli mai ai, na faamanatu mai ia te a'u, o le musu e faasala ma le naunauta'iga e faamagalalo, e mafai ona pa'i atu i soo se tasi, e oo lava i le loto e sili ona malu puipuia. I le tulaga lea, e matala mai ai faamoemoega fou o avanoa e gafatia. Mata e i ai se avanoa, o le iloa lelei e Peteru o le silafia manino a Iesu, o lona alofa ma lana faamagalalo, na nuti ai le fatu o Peteru?

Na silafia lelei e Iesu Peteru. Na Ia silafia o Peteru e toa ae osovale. Na manino lelei Iesu ia Peteru a o ia 'omia i lalo o le mamafa pe afai e fetaomi mai faafitauli, e pei o le taimi na ia savali ai i luga o le vai (Mataio 14:29-31) ma amata ai ona magoto ifo, ma ia mana'omia ai le aao o Iesu e si'i a'e o ia i luga mai le vai. Na talanoa foi Iesu ma Peteru e uiga i le faamagaloina. Ina ua fesili Peteru pe faafia ona ia faamagalalo atu, sa tali Iesu i se tali e sili ona mataalofa (Mata.18:21-22). Ma o lenei, ina ua malosi na'uā ma tele le avega mo Peteru i le lotoā i lea po, ua fesiligia ai lona avega ma soo faamaoni o Iesu, na magoto ma faafiti ai loa o ia. Na ia toe pepelo faalua ina ia puipuia ai o ia. O se faalataga mata sa tuia tele ma tigā ai Iesu. Sa faamamafa atili ai lona faanofosea toatasi na o ia, a o ia tauivi e faatoilalo auala o le oti ma le faaumatia, ina ia manumalo Lana faiga malo ma le olataga. Peita'i, na te le'i taofia lava lona alofa i lona soo, o Peteru.

† Iesu e, ua e silafia a'u ma ua e sisila i mea ou te mafaia. Ia e sisila alofa mai ia te a'u, tusa lava pe tuia ai lo'u fatu. Amene.

Mo Mafaufauga Atili: I le lalolagi o siomia ai a'u, o i ai ni auala e mafai ai ona ou vaai i nisi tagata ua tatau ai le faasala, i mata o le alofa ma le faapalepale?

Tusi Faitau: Mareko 15:1-15, *"Ona fesili mai lea o Pilato ia te ia, "O oe ea o le tupu o tagata Iutaia?" Ona tali atu lea o ia ia te ia, "O lea lava." ³Ua momoli foi ia te ia e le au ositaulaga sili i mea e tele. ⁴Ona toe fesili mai lea o Pilato ia te ia, "E te lē tali mai lava ea? Faauta i le tele o mea ua latou molimau ai ia te oe." ⁵A ua lē tali atu e Iesu sina upu; o le mea lea ua ofo ai Pilato."*

Aiseā na lē soona saunoa ai Iesu e puipui o Ia ma tete'e atu i ona moliaga? Atonu ua Ia silafia e lē toe i ai se uiga, auā ua mautū i mafaufau o le Fono le mea a latou fai. Mata e lē o taumafai Pilato, lea na mulimuli ane mana'o e faasa'oloto Iesu nai lo Parapa, e saili se auala e faasao ai Iesu iinei, e ala i lona mana'o ia Iesu e tuuina atu nisi faamatalaga? E foliga mai o loo mana'o Pilato e fia faalogo i mau o le tete'e a Iesu. Atonu o le sālō o Iesu ua tatala mai ai le avanoa mo tatou e malamalama ai, e i ai taimi e faasalaina ai tatou ae tatou te le'i tautala atu. O le a lava la tatou upu e fai atu, ae ua uma ona fai le faai'uga. Ua ou vaaia lenei mea o tupu i nisi o a'u uo, na avega o latou ituaiga ma ala ua faaosoina ai le faaitu'au ma le faailoga lanu: e lē maua se avanoa i se galuega, pe lē mafai ona taliaina i se tapuaiga!

Ua uma ona fai le faai'uga a le Fono e lē tatau ona tupu mai le Mesia mai Kalilaia (Ioane 7:41, 52). E oo lava ia Natanielu le soo o Iesu na ia fesili, *"⁴⁶E mafai ea ona tupu o se mea lelei mai Nasareta?"* Ioa. I. E pei lava ona avega le gagana a Peteru e faailoa atu ai lona tupuaga i le lotoā ina ua ia tautala atu e puipui o ia, e faapena foi Iesu ua oo i le tulaga ua uma ona ta'usalaina ona o le inosia ma tu'uaiga sesē soona fai. E leai se mea na te lavea'iina o ia mai le faasatauroina ua uma ona fuafua e ta'ita'i o le tapuaiga ma le pule a Roma. Ua fetalai manino Iesu i lona faasinomaga. (O le fesili i le gagana Eleni, 'O oe o le Tupu o Iutaia?') Na faaleo e Pilato, ma faalogo ai le Ositaulaga Sili i le "O A'u Nei". E leai se mea e tau faafitia e Iesu – o Ia lava lea. Ua uma upu.

† Iesu e, o au fetalaiaga e pele ia te i matou, ae o nisi foi taimi e te sālō ai. Tatalo i totonu o lo matou lē leoa ma lo matou lē i ai, ma fa'aali lou alofa ma lou mutimutivale i nei nofoaga ma ia taimi.

Mo Mafaufauga Atili: Pe afai e mae'a ona fai o tala e tatau ona fai, o le a se mea e ta'u mai e le sālō faasino i o tatou loto?

Aso Lulu, 31 Mati 2021

Ua Uma Upu

O A TATOU MEA E 'AI E TATAU MA LE ASO

Aso Tofi Paia, 1 Aperila 2021

Iesu, fai ma ata o le faalumaina

Tusi Faitau: Mareko 15:16-20, *“¹⁷Ona latou faa’ofu lea ia te ia i le ofu pāuli, ma latou ta’ata’ai la’au tuitui ua fai a’i le pale, ua faapaleina ai o ia. ¹⁸Ona latou alolofa mai lea ia te ia, “Talofa le tupu o tagata Iutaia!” ¹⁹Ua latou ta’foi i lona ao i le u, ma feanu ia te ia, ma tootuli ma ifo ia te ia.”*

I la’u galuega feagai ma le fefaataua’iga o tagata, sa masani ona ou te’i ma lagona le ma’i i amio a tagata e fai i isi tagata ola. E peisea’i o i latou o loo faia lea solitulafono, ua latou filifili e avea tagata ua latou maua i a latou pisinisi leaga, e pei o ni mea ola (tulou) ae lē ni tagata soifua. I le faitauga o lenei aso, o Iesu ua lē gata ina sālō, ae ua Ia lē pulea foi le gasologa o mea o le a tutupu. O le gaioiga faatino ua faasaga ia te Ia, nai lo i Lana faasinoga. Ua uma ona sasa ma ua i lima o fitafita. E leai se isi avanoa e ono faamautū ai le faasaolotoina o Ia. O le i ai o Ia i lima o fitafita na fesaga’i ai Iesu ma le faalumaina. Ua latou faia o Ia e pei o se meataalo meaola po o se mea taufaafefe, ma ta’ita’i solo o Ia i se taaloga faa-lē-migao, a o latou faia le pale tuitui ma tootuli i ona luma. O le ‘au faaosala ua latou faatino se aganuu tau maliu, e faataga ai i latou e faatigaina ma faamāsiasi. O le lē leoa o Iesu i luma o Pilato ma le Fono ua faateteleina. O Ia o le tagata, ae ua faafilemuina ma faalumalumaina. E pei o se tagata ua fefaataua’i, ua i ai Iesu i lima o ona fili. E peisea’i ua i ai o Ia ina ia faafiafia ma faamalie i latou. O le tagata e sili ona atoatoa o Iesu – le tagata a’ia’i e sili atu nai lo fitafita po o se isi lava tagata i lenei tala faale-tagata – o Ia o le Atua, i totonu o tagata, ua fesaga’i ma le teena o Ia. Ua ulagia o Ia e isi tagata ae ua leai sona mapusaga i taimi faigata. E le taumate ua fiafia fitafita e fa’aaogā le faalumaina o lenei tagata ina ia faaosofia ai ua latou maua le paoa. Lea la ua ia faatali, a o saisaitia i totonu o le maota o le kovana, mo lona faasatauroina.

† Keriso e, lo matou uso, o le ola ma lo matou ala, fesoasoani mai ia ‘aua ne’i matou avea tagata e pei o ni oloa po o ni mea faitino. Faaali mai i latou o loo lē amanaiaina, o leiloloa po o natia, ina ia matou avea i latou o uso, tuagane ma tuafafine. Amene.

Mo Mafaufauga Atili: Ua tatou faaeaina ea i tatou i luga a’e o isi tagata e sili ona ma’ale’ale nai lo tatou, ina ia faafiafia ai i tatou?

Aso Maliu, Aso Faraile Lelei, 2 Aperila

Ua vaaia le Atua i le satauro

Tusi Faitau: Mareko 15:21-39, *“³⁷Ua alaga Iesu ua leo tele, ona to ai lea o lana mānava. ³⁸Ona saehuaina lea o le ie puipui o le malamalu, ua amata ifo i luga, ua oo lava i lalo. ³⁹O le ta’ita’i o le toaselau, o le na tu atu i ona luma, ua iloa e ia ua faapea ona to o lana mānava, ona faapea atu ai lea o ia, “E moni, o se Alo o le Atua lenei tagata.”*

O le fale sa ou nofo ai i lo’u tamaitiiti sa i ai se potu teu oloa malosi, e leai se faamalama ae i ai lona faitotoa malō. Sa ou fiafia e fai ma masani le loka ai i totonu o lea potu. O le aunoa o sina malamalama sa suia atoa lo’u lalolagi. I le loloto o le pogisā sa lē mafai ona ou iloa se tagata. Peisea’i ua na o a’u, e ui ina sa i ai lo’u uso i o’u autafa. Na ou iloa ou te saogalemu, o loo puipuia i totonu o le potu; peitai mo Iesu, i luga o le satauro, sa aunoa ma le malamalama, ma e lē o malu puipuia o Ia: e leai, o lo o fa’aaliali o ia i luga o le satauro. O Ia o le malamalama, le malamalama o le lalolagi, ua i totonu o le pogisā e sili ona loloto. Ua tuulafoa’iina o Ia e le Atua? Pe mata e toe faafoisia lona ola? E toe susulu le malamalama? I le taimi ae le’i faatofuina Iesu i totonu o le oti, na sau ai se tagi leo tele mai ia te Ia, ma tatala mai ai avanoa fou mo tatou. O le a lava le uiga o lona tagi leo tele, a o tu’ua le fofoga o Iesu, na ia lūlūina le fitafita sa tiute i lona aso, i se tulaga na faatuatua ai. Mo sina taimi puupuu i totonu o le pogisa, ua mafai ona vaaia ai le tagata tonu o Iesu. Ua lē o toe i ai Iesu i totonu o aai ma maketi ma luga o magaala, o faia faailoga matagofie ma folafola upu mananaia. E leai, i lenei itulā, a o saeluaina le puipui i le va o le lagi ma le lalolagi, ua vaaia ai e le fitafita Iesu i lona tulaga aupito malepelepe ma masofasofa a o ia tau tepa a’e i le lagi. A o mānava e Iesu lana toe mānava, ua Ia faaali i le fitafita Roma, mai le tulaga e tasi e pei ona sa i ai i latou sa amusia ma feanu ia te Ia. I lenei aso, i lenei lava taimi, ua tatou vaaia ai foi Iesu, a o maliu o Ia.

† Le Keriso faasatauroina e, ia e saeia le ie puipui, sii a’e lou si’ufofoga ma fa’aali lau Afio ia te au e ala i lou auai mai. O lou vaivai i luga o le satauro, ua matala ai faitoto’a o le faamoemoe ma le faatuatua.

Mo Mafaufauga Atili: I ataata ma faanoanoaga o le Aso Faraile Lelei, ua iloa ai e le fitafita Iesu. O fea e mafai ai ona ou vaaia Iesu i nei aso?

(faauma itulau 14)

O LE MANŪ TO MAILAGI

“O e faalagolago i le Alii e faapei o le mauga o Siona i latou; e le faagaetia ae tumau...”

O le faapaiaina o le Maota o le Galuega EFKS Papa Sataua, sa faia i le afiafi o le Aso Faraile 26 Mati, sa taitaiina lava e le Faafeagaiga Taulagi, susuga Toeaina Amuia Seuala FT ma le faletua ia Veronika. Ua faaigoa lenei maota o MANŪ TO MAILAGI, e tusa o se fautuaga a le Tama Toeaina i lana Ekalesia, ia atagia ai le manuia to ifo mai Lagi o le tagata e faalagolago i le Atua, e faapei o le laau e toto i tafatafa o vaitafe (Salamo 1). O le faletua ia Susana Soliola na ooti le lipine, ona ulufale lea o le Pulega, o lupe faalele a le EFKS Papa, ae maise lana afioga Taitaifono Fono Tele. O le susuga Leaula Faletoese FS (Falealupo-uta) na saunia le Lauga, na faavae i le TFA, Tatalaina o se Auala Fou. O le fua o le maota e 58' x 60', e 5 vaiaso na fausia ai e le afioga i le Matuaofaiva ia Seualuga Peleseuma o se totino lava o le afioaga, ma le Falefa o le Aiga Salemalama.

Na saunua le susuga Amuia i le tala ootoo o le galuega: O le tau o oloa na faatau mai le SMI e \$60,024. O isi oloa e le'i faatauina mai le SMI e \$3,365.50. O piliki e ese le fale na faatau ai e \$4,752. O le oneone ma maa e le'i faatauina, na ofoina mai e nisi o le Ekalesia, peitai na tuuina atu i ai fesoasoani mo fela'uaiga o lea auunaga e \$5,360. O le pemitā o le galuega e \$1,500, ma isi tupe fa'aalu e \$39,553 maua ai le \$114,552.43. O isi vaega tupe e \$4,378 e maua ai le aofai atoa o le tau o le galuega e **\$118,930.43**. O nei tupe uma sa maua mai i faaputuga tupe a le Aulotu, o le Sene ma Atina'e masani, faapea le fesoasoani mai a alo ma fanau o lupe faalele a le Ekalesia i Apia ma Salafai nei. E le'i tagofia lava se nogatupe, ae na tagi lava i lima ma le foai a le Atua na to mai Lagi ala mai le eleele ma le sami. O le afioga Taitaifono Fono Tele na saunua faafetai i le susuga i le Toeaina ia Seuala, ma le mamalu i le Ekalesia Sataua e toatele ai Tamā ma Tinā matutua, i lo latou soifua faatuatua, soifua galulue ma tautua mo le Atua ma lana galuega. Na ia faafetaia foi le afioga Matuaofaiva talavou ma lo latou aiga, faapea le Pulega i le lagolago malosi i le susuga Toeaina ma le Faletua. Ona ia tauaao atu lea o le meaalofa a le Ekalesia Aoa e \$10,000, faapea a la'ua meaalofa ma le afioga Sui Taitaifono Fono Tele sa le mafai ona faatasi atu, ma faai'u ai i taumafataga ma fa'aalologa faaleaganuu ua masani ai le EFKS. *Malo le galulue. Ia i le Atua le viiga e faavavau.*

O LE FAAMATI **(Lūlū ma Selesele).**

Tusi Faitau: Mataio 25:31-46

Matua: Mataio 25, *“³⁶Na ou lē lavalavā, ona outou faaofuina lea o a'u; na ou ma'i, ona outou asiasia mai lea o a'u; na ou i le fale puipui, ona outou o ane ai lea ia te a'u...⁴⁰E moni, ou te fai atu ia te outou, **auā na faia e outou i le tasi o e aupito itiiti o o'u uso nei, o a'u lea na outou faia i ai.**”*

“O le mea e te lūlū, o lena foi e te toe selesele mai” – o se tasi lea o alāfua ua faataatia mai e le Atua, mo lo tatou ola i le lalolagi nei, e pei ona a'oa'o le aposetolo ia Kalatia (6:7). O se alafua amiotonu e lē gata mo le soifuaga lautele, e ati a'e ma saili ai malo mo le manuia o aiga, o pulega faalenuu ma faiga malo, ae faapea foi i le soifuaga faaleagaga – le ola faatuatua, le ola tapua'i ma le ola tautua mo le Atua ma le Tala Lelei. O lau na sa lūlū, o lau na lea o le a toe selesele mai. Ua masani ai le au faifaatoaga, auā o le natura lea o la latou fatuaiga - e totō, e lūlū ma toe selesele. Pe afai e te tigaina, e onosa'i ma faamaoni e lūlū ma totō le fatu lelei, e i ai lau seleselega matagofie e mulimuli mai se aso. Mo nisi, e lē pine ona vave mai lea aso; ae mo nisi foi, e faatuai, e faitau masina ma tausaga, po o auga tupulaga le faalevaleva faato'a selesele. O le faamanatu, ia tatou onosa'i ma faatuatua, o i le Atua lana utaga poto ma lana faatofalaiga mamao, e silafia le taimi ma le auala talafeagai mo oe ma a'u. Ae o le mea mautinoa pei o la le Fai Salamo, *O ē lulu saito ma loimata, latou te seleseleina ma le alaga fiafia. (Sal. 126)*. E i ai foi nisi aso tatou te fesiligia ai le amiotonu o le taaviliga ma taualumaga o le soifuaga nei i la tatou vaai. Ua lē paleni le amio leaga o mea e lūlū, ma le mananaia o manuia faalelalolagi e faula'i mai. Peisea'i ua fiu e fai mea lelei, ae sili ai manuia o tagata fai mea leaga. Ao lea ua toe tali mautinoa le Fatupese, *“Aua e te faameo ona o e amioleaga; aua foi e te losilosilosi ona o e fai mea leaga. Auā e le pine ona sele'eseina i latou e pei o le mutia; e mamea i latou e pei o le vao mu'a lauolaola.”* Sala. 37:1-2.) E faamaoni le Atua i Lana lava pule faitalia, e amiotonu Lana faasoa ma paleni Lana faamanuia, e tusa ma le taumafataga a tagata taitoatasi, o ai le ituaiga, o fea le atunuu ma le malo, o ai le Aulotu ma le Ekalesia.

O le tulaga lenei o loo a'oa'o manino mai i le Tala i le Faamasinoga, na tu'ueseese ai ituaiga tagata e lua, e pei ona tuu ese mamoe i le itu taumatau, a o 'oti i le itu agavale. O le aso na to laulau ai le seleselega – o le seleselega o faamanuiaga mo i latou i le tasi itu, le itu taumatau, a o le seleselega o faanoanoaga ma mala mo i latou sa i le isi itu agavale. E fia faamamafa nei le tau i latou sa i le itu taumatau. Na fetalai i ai le Tupu, le Faamasino Sili, o le Atalii lava lea o le Tagata, “*O mai ia, o outou ua faamanuiaina e lo'u Tamā, ia fai mo outou tofi le malo ua saunia mo outou, talu ona faavaeina le lalolagi.*” Oka oka, se mālie o le siufofoga, o le logo i tino o matagi lelei, o lenei valaau. Ua pei o ufi e tutupu lagona, e nene'e le loto i le fiafia ma le olioli, o le seleselega, mai le alofa tunoa o le Atua. Malo le lūlū lelei, malo le lūlū faatamalii, faatupu, faaleAtua, outou sa i ai le Agaga Faa-soo. Malo o lau pule lea. Ae alo mai ia, se'i taumafai atu lou Alii, i Lana faamanuia mo lau seleselega, e tauia ai lou tagata faatuatua, ua inu malie Lona finagalo paia i lau tautua matavela ma lau auaunaga lē faalogologotiga. O lou matūpalapala lena, le Malo o le Lagi, le Ola e faavavau. Le Malo e te mau tofi ma pule faatupu ai, faatasi ma lou Alii Faaola o Iesu Keriso, le Tama'i Mamoe na fasia, o le Tupu o Tupu ma le Alii o Alii.

O le fesili, O a mea na lūlū e i latou nei? Fai mai le Tupu, auā na fia 'ai, ona latou avane lea o mea 'ai mo ia; sa fia inu, ona latou avane ai lea o vai e inu ai; sa fai ma tagata ese, ona latou talia lea o ia, sa ma'i, na latou asiasi atu, sa i le fale puipui, ona latou o ane ai lea ia te ia. Sa latou avatu, ae le'i taofia; sa faasafua atu, faasoa atu, faagaogao i latou ina ia tumu ai le isi. Na latou iloa atu ua pagatia, na iloa ua tataua ona fai se galuega alofa, ma fai loa. Sa le'i 'alo i le ata o le niu, pei o le sa Levi ma le ositaulaga i le Faataoto i le Samaria agalelei, sa le'i fai faanoi ona o faafitauli ma tuatuagia, pei o le pagatia o tamaoaiga i aafiaga o le Koviti 19. Sa le'i faailoga le lanu, le gagana, le ituaiga. Sa vaai, sa ootia, sa faia loa le galuega alofa. E le'i natia le segia o mauili o i latou, i nei faamanuiaga auā sa faia lava le auaunaga aunoa ma se faatilomata i se tau. Sa moni le alofa atu, auā o la latou lea masani na a'oa'o ina ai, na vaai o fai e o latou tua'a, le alofa i le tuaoi, le tagata ese, ma soo se tasi. Lenei ua faate'ia! O se mea moni ea poo se miti? O ai na manatu o le a si'i le fale o Asomua? Auā, o anafea? O le ā le taimi na matou faia ai nei mea ia te oe? Ona tali atu ai lea o le Tupu, “*E moni, ou te fai atu ia te*

outou, auā na faia e outou i le tasi o e aupito itiiti o o'u uso nei, o a'u lea na outou faia i ai.”

O le taimi lea, ma le auala lea, na latou faia ai le galuega lelei – ina ua latou fai i le tagata e aupito itiiti. Ua ta'utino e Iesu, o la lava lea sa faia i ai le auaunaga alofa ma le agalelei. Le vasega e aupito itiiti le tāua i soo se itu, aupito itiiti le malosi ma le maloloina, aupito itiiti le ola a'oa'o ina, aupito itiiti le tamaoaiga, leai se tofi, se tulaga, se galuega; e faatauvaa, e lē taualoa i saofaiga; e aofia ai e mama'i i gasegase tumau ma i ai mana'oga faapitoa, aofia ai tagata ua inosia ma tuulafoaiina, o pagota i fale puipui. O i latou ua itiiti pe leai se faamoemoe e toe foi i se lelei – i latou uma ia fai mai Iesu, o la lava lea. O Keriso lava lea sa pagota, sa mativa, sa fia 'ai, fia inu. Le vasega ma le ituaiga tagata e lē gafatia ona latou toe tau mai oe; a o Iesu na te tauia mai. O le upu galue tāua iinei, o le **FAIA**; *auā na faia e outou... o a'u lea na outou faia i ai.* Na faataunuu, na faatino, ae lē na ona mafaufau i ai, pe na ona fuafua, e folafola, e saunoa ma fetalai i ai. E Leai. E lūlū faatino, lūlū faataunuu, lūlū ma totō ina ua fai nei, fai pea ma fai soo. E faapea foi le seleselega e aumai e le Atua. E lē na o ni folafolaga, ae moni ma faamaoni le tino mai o faamanuia a le Atua, e tauia ai le tagata e alofa faamaoni ia te Ia.

Le EFKS pele e, o oe lava na muaimalae i lenei ituaiga auaunaga faapitoa e ta'ua o le Faamati, e faaopoopo i lau tautua masani i isi auala. Ua e masani ai i lenei masina, ma lenei auala o faiga taulaga i le Atua - o le faalelei atili o measina, meatotino ma aseta o le galuega, ma faa'olua le aufaigaluega paia a le Atua. O nisi Ekalesia ua fai Faamati i Malumalu ma Maota o Galuega. Malo le faamati lelei. Ua e manino foi i Afioga faamanuia a le Atua, i le sili o le manuia e maua e lē na te foa'i, o lē na te lūlū – o lou ma'au mo le Faamati o lenei tausaga e lē lilo i Le ana le galuega. E lē pa'ū i se papa poo se vai, ae o le fatu e pa'ū i luga o le eleele lelei, e tupu ola ma fua mai ai taufuifui, taufetiiti, le fuata e te selesele. O lou ola e lē oti, ae faavavau. Ua faai'u le Faamati o lenei tausaga i le vaiaso paia na faamamalu ai le Faamati Silisili na faia e le Atua mo lo tatou lelei, lo tatou manuia, lo tatou faaolataga. O le Faamati na faia e le o ni oloa ma tamaoaiga faitino o le lalolagi nei, a o le soifua paia o Lona Alo pele e toatasi o Iesu Keriso. E le'i faapelepeleina pe taofia, ae na foa'ifuaina mai ina ia togia a tatou sala; na maliu tiga i le satauro, ae na toe tu manumalo mai le oti, ua tatou ola uma ai. Osana. Aleluia. Amene.

O E UA FAI I LAGI FOLAUGA

KERETA TOOMATA FAATONU FS (29/6/1952 - 4/3/2021) 68+8+5

O le faifeau nofo aiga, sa soifua mai le Aso Sa, 29 Iuni 1952 ae na faamanavaina ana feau e lona Matai i le Aso Tofi, 4 Mati 2021 (ua 68 tausaga, 8 masina ma aso e 5 lona soifua). O ona matua o Liumaunu Seuamuli Faatonu Vaaelua o Satoalepai (Tama), a o Talifaiaeloufetalai Leota Lu I o Avao (Tina). Sa faaipoipo atu ia Vaaifetu Siasosi, e to'a fitu o la'ua alo, a o fanau a fanau e 21. Na maluu Vaaifetu ona toe faaipoipo lea ia Imoasina Tofilau (ua maluu). O lona soifua a'oa'oina sa amata mai i Satoalepai, Avao ma le Itumalo i Fagamalo, ona sosoo lea ma le Kolisi o Samoa. Sa ulufale ma Vaaifetu i le Kolisi Faafaifeau Malua i le 1986 seia oo i le 1989. Sa i ai foi le taimi na a'oa'oina ai i le Iunivesite o Tasmania, Ausetalia i le 2016, a o faigaluega i le Ofisa o le Fono Faitulafono o Samoa. O galuega sa galue ai, o le Faletupe o Samoa i Sisifo (BWS), ma le Ofisa o Tagata Faigaluega a le Malo (PSC) mo le silia i le 10 tausaga. O le i'u mai le Kolisi Faafaifeau Malua na valaauina ai e le EFKS Samusu, Aleipata i le 1989 - 2004. Sa galue i le Komiti Tupe ma le Komiti A'oga a le Ekalesia. Sa galue i le Ofisa o le Fono Aoaofaitulafono i le 2006 - 2021, seia oo ina fai o ia ma faauluuluga o le Vaega Faaliliu Upu. Sa fai foi ma sui o le Komiti o le Gagana Samoa.

O lona Sauniga Faaleaiga sa taitai le susuga Faasalafa Vitaoa FS o le EFKS Vailima. Sa toatele e na molimau i lona soifua aoga ma le faatuatuaina. O lona faatuatuaina i le saofaiga a lo latou aiga i soo se mea, ae maise lava i le taupulega o faalavelave. O ona toe sauniga sa faia i le Aso Toonai, 13 Mati 2021 i le Malumalu EFKS Tanoalei'a, Vaivase-uta. O a'u sa taitai, o le susuga Iese Uele FS (Vaiala) sa momoli maia le sa o le auauna. Sa molimau le susuga Faasalafa Vitaoa FS o le faifeau EFKS Vailima, i taimi o lona soifua a o latou galulue faatasi ma le auauna i tausaga e tele. Sa molimau le Fofoga Fetalai o le Maota Palemene, afioga Toleafoa Faafisi e fai ma sui o le malo faapea le Ofisa o le Fono Fai Tulafono. O Leota Lu II sa molimau e fai ma sui o le aiga, o Talifaia Faatonu Sila sa fai ma sui o le fanau e molimau i le mafutaga ma le tamā. Sa momoli mai alofaaga o le usoga ma fanau mai atunuu i fafo, e ala mai i fesootaiga faaneionapo. Sa molimau foi le susuga

Sa molimau foi le susuga Hemi Faatonu FS (Mulifanua) e fai ma sui o usoga ma le aiga. O susuga i faifeau o Semikueva Faatoafe FS (Moataa) na faitauina le Tusi Paia, o Ionatana Te'o FS (Mauga Fiafia) na tatalo, ma Seilala Luamanuvae FS (Vaivase-tai) na fofogaina le upu faamafanafana. O a'u sa molimau i lona soifua faaleagaga. Sa lagiina foi le pese aualofa a le Mafutaga Tama EFKS Tanoalei'a. O le tele o lona soifua sa auauna ai i le Atua, e le gata o le faifeau o le Tala Lelei, o le auauna o le Upu ma Sakarameta, ae faapea foi le auaunaga mo le atunuu, i galuega e pei ona faailoa atu. O se tagata e galue faamaoni ma le faatuatuaina, seia oo ina valaau lona Matai. *"E moni, e moni, ou te fai atu ia te oe, ua e fusi oe ina o e taule'ale'a ma e fealua'i i mea na e loto i ai, ae pe a e toeaina, e te faaloaloa ou lima e fusifusi foi ia te oe e se tasi, ma ave oe i le mea e te le loto i ai."* Sa faai'u ai i lona oliolisaga tumau i lona aiga i Tanoalei'a, Vaivase Uta, ma faatofa atu i le uso i le Pese, *Talofa uso e, tofaina oe, Ua sau le itupo e malolo.* Manuia lau malaga Uso.

Saunia e Enefatu Lesā FT, EFKS Tanoalei'a, Matagaluega Apia Sasa'e.

O A TATOU MEA E 'AI E TATAU MA LE ASO

Aso Toonai Lelei, 3 Aperila 2021

Alofaina ina ua maluu

Tusi Faitau: Mareko 15:40 – 47, *"⁴⁶Na taulia foi e ia le 'ie lino, ua ave ifo foi ia te ia, ona 'aui lea i le 'ie lino, ua tuu foi ia te ia i le tuugamau na foa i le papa, ona fuli ane lea o le maa i le gutu o le tuugamau. ⁴⁷Ua vaavaai foi Maria le Makatala, ma Maria le tina o Iose i le mea na tuuina ai o ia."*

O le avea ai o a'u ma se faife'au talavou o loo faamasani, sa tofia ai e mulimuli ma tulimata'i le galuega a se tamaitai tausima'i i le Vaega o Faalavelave Faafuase'i. O se tasi aso na taunuu mai ai se tamā i le taavale a le falema'i, ua tigaina lava lona gasegase i le fatu. Na galulue alii foma'i e tau togafiti ma lavea'i mai lona ola i auala masani, peita'i na uma lava lona soifua. Na tusia le taimi na uma ai lana mānava i luga o le laupapa, ma ou manatunatu

O E UA FAI I LAGI FOLAUGA

SOI MALIA ALE

25/7/1959 – 24/9/2020 (61+2)

O le Faletua o le Tiakono o Ale Arona Ale, Aulotu EFKS Frankston, Pulega Melepone i Saute, Matagaluega Vitoria Ausetalia. Na soifua mai o ia i le Aso Toonai, 25 Iulai 1959, ae maliu filemu i le Aso Tofi, 24 Setema 2020, i le Falema'i Monash Hospital Victoria. O ona matua o, Upusili Tuiatua Ve'e o Fasito'otai ma Uimaninoa o Vaisala Savai'i. Na fanau o ia i Vaimoso, Faleata. Sa a'oa'oina i le Aoga a St. Marys' i Vaimoso, Apia ma fa'asolo ai ina faigaluega i Apia i nisi taimi, ma Asau Savai'i i nisi tausaga o lona soifua talavou. Sa a'afia o ia i le gasegase o le ma'i fatu ao talavou lona soifua peita'i, sa alofagia lava o ia e le Atua ma foa'i i ai le malosi sa faigluega ai, seia o'ona malaga mai i Niu Sila ma fa'aiu mai ai i Melepone Ausetalia i le tausaga e 1991. Sa fa'aipoipo ia Ale Arona Ale o Fasito'otai i le Aso Toonai, 8 Fepuari, 1997 i le Aulotu EFKS Frankston. E toa lua si a la fanau tama. O le masina o Ianuari 1998, na toe oso ai lona ma'i fatu, o le stroke ma fa'ataotolia ai i le Falemai mo ni masina e tele. Sa alofagia o ia e le Atua ma toe maua lona malosi e fa'amaopoopo ai lana fanau, o lona toalua ma si o latou aiga ausage.

Na fa'auuina lo la Tofi Tiakono i le Aso Toonai, 31 Mati 2012 ma galulue fiafia ai seia o'ona tā le logo mānava o lona ola tauivi ma finafinau i lenei olaga. O Soi, o se sui auai o le Mafutaga a Tinā, o le Aufaipese ma le Autalavou. O se tinā e a'afia i se gasegase faigatā, ae telē le loto, sa tatalo ma tauivi ai ma le fa'atuatua ai i le Atua. Na maliu o ia i le taulotoaiga o le Fa'ama'ioti – COVID-19. Ui lava i le mamafa o puipuiga o lenei fa'ama'i, ae sa mafai lava ona fa'ataunu'u lona Toe Sauniga i le Malumalu Tapua'i o lana Aulotu, "O Aao o le Fa'avavau" i le Aso Gafua, 28 Setema 2020. Sa ou taitai lava i le Sauniga atoa. O le Tiakono ia Ale Arona sa molimau i le la Feagaiga tu'uoti ma le fa'agalogatā. Molimau foi le fanau ma nisi o le aiga, fa'apea foi le sui o le Mafutaga a Tinā, o Lemafo'e I. Pesaleli. O le Fa'aaliga a Iesu ia Ioane, Mataupu 21:7. "O lē manumalo e maua e ia mea uma, e fai foi A'u mona Atua, e fai foi o ia mo'u atalii." Ua folafola mai e Iesu, o le tau i lea o le tagata e ola tauivi, onosa'i ma fa'atuatua ia te

Ia, a'o feagai ma fitā ma puapuagā o le ola auuina atu ia te Ia. E avea o ia ma atalii po'o afafine o le Atua, i lona Malo fa'avavau.

Fa'amaise le Agaga o le Keriso Manumalo, i le tamā ma le fanau ma o la aiga ma le Ekalesia ua tuua.

Ia manuia e ua oti o i le Ali'i.

Saunia: Iakopo Poufā Pesaleli F.S.

EFKS Frankston, Pulega Melepone Saute, Matagaluega Vitoria.

MEA'AI E TATAU MA LE ASO

ifo poo le a le isi mea o le a sosoo, ae laa mai loa le tamaitai tausi soifua. 'Taatia mai loa ia te a'u ou te vaai', o lana upu lea, ma faa-avanoa ai ana uo tausima'i e vaai atu i isi gasegase. Na ou faatasi pea ma le tamaita'i, a o ia talanoa lēmū atu i le tagata ua tuua lenei lalolagi. Na ia ave ane se solo e faamamā ai lona tino, ua sōloi ma le filemū ona lima, ma faamamā vaega na faaleagaina ina ua pa'ū o ia. 'Talofa e, ia te oe', o lana musumusumu lemu lena a o ia aveese pa'u o fusi na faate'i ai lona fatu, ma sōloi ese mea na iloga i lona tino. O lena aso na ou iloa ai le mea lenei: o gaoiga o le alofa e mafai ona tupu mai i nofoaga e aupito sili ona pogisā. O Iosefa le Arimataia ma fafine sa i ai ua latou faailoa mai le auala na latou alofaina ai Iesu i lena afiafi. Na affi e Iosefa le tino o le faia'oga pele, le a'oa'o le rapu le uo, o lē sa matua'i ulagia, sasa ma faasatauroina, i se 'ie lino faatauvaa. O Maria e toalua na vaavaai, ma iloa le mea na tuu ai le tino. O la'ua loto na ta'u atu la te toe o mai, pe a mavae le sapati, e u'u lona tino maliu. La te toe foi mai e fa'aali la la'ua tausiga ma le agalelei, ua fanau i le alofa ua sili ona loloto.

† Matou te saili i Lau afio i totonu o le tuugamau, le Keriso e, ua iloa ai o loo matou alolofa pea ia te oe. Ia avea le mānava mai o le Agaga ma le alofa o le Tamā, e toe faatasia ai i tatou pe afai e faailoa mai e le vaveao le aso fou. Amene.

Mo Mafaufauga Atili: Pe ou te iloa se tasi o loo taotaomia i ata paolo o le faanoanoa, mafatiaga ma sauaga? E faapefea ona ou fa'aali atu le alofa ma le agalelei ia te i latou?

O E UA FAI I LAGI FOLAUGA

SOI MALIA ALE



FAAPAIA PETELI LE FALE O LE ATUA, EFKS SASINA



Panapa To'o FS, Palemia Tauilili FT, Iosefa A. Uitelea FT, Tanielu Apineru FT, Tunumoso FT & Susana Soliola



Nisi o le Au Faau'u Aoga Tusi Paia Malua ma le Susuga Valaauina Taumafai FS, EFKS S/lologa.



Susuga Risati Taua FS & Suitupe, faa-feagaiga taulagi EFKS Saleilua, Falealili Safata Siumu.